

## STJÓRN ORKUVEITU REYKJAVÍKUR

Ár 2008, mánudaginn 29. desember kl. 12:15 var haldinn 102. fundur í stjórn Orkuveitu Reykjavíkur. Fundurinn var haldinn að Bæjarhálsi 1.

Þessi sátu fundinn: Guðlaugur G. Sverrisson, Júlíus Vífill Ingvarsson, Kjartan Magnússon, Sigrún Elsa Smáradóttir, Svandís Svavarsdóttir, Gunnar Sigurðsson og Björn Bjarki Þorsteinsson.

Ennfremur sátu fundinn forstjóri, framkvæmdastjóri fjármála og framkvæmdastjóri framleiðslu og sölu.

Fundarritari var Eiríkur Hjálmarsson.

### Þetta gerðist:

#### 1. Arðsemi virkjana.

Framkvæmdastjóri fjármála flutti kynningu um efnið og lagði fram að nýju minnisblað Elínar Smáradóttur varðandi fyrirkomulag reksturs m.t.t. samkeppnislaga dags. 19. september 2008 ásamt yfirlitstöflum yfir kostnaðarverð raforku fyrir almenna notkun á höfuðborgarsvæðinu og tilvikagreiningu raforkuverð til álvers.

#### 2. Lagt fram minnisblað forstjóra dags. 23. desember sl. varðandi arðsemismat virkjana, fjármögnun o.fl.

#### 3. Samningur um raforkuviðskipti við Norðurál Helguvík ehf.

Lagður fram samningur við Norðurál Helguvík ehf. „Draft (Amendment), Power Contract“ dags. 17. desember 2008, ódags. minnispunktur um breytingar frá fyrri samningi aðila, Minnisblað Logos lögmannsþjónustu um breytingar á orkusamningi dags. 22. desember 2008 ásamt svohljóðandi tillögu:

Stjórn Orkuveitu Reykjavíkur samþykkir framlagðan samning við Norðurál Helguvík ehf. fyrir sitt leyti og samþykkir jafnframt að óska staðfestingar eigenda.

Tillögunni fylgir greinargerð.

Svandís Svavarsdóttir lagði fram svohljóðandi tillögu um raforkuverð:

Stjórn Orkuveitu Reykjavíkur samþykkir að aflétta með formlegum hætti leynd þeirri sem nú hvílir á fyrirbyggjandi samningi milli Norðuráls og Orkuveitu Reykjavíkur. Engin rök mæla með leyndinni og brýnt að almenningur, eigendur Orkuveitu Reykjavíkur séu upplýstir um verðið.

Guðlaugur G. Sverrisson, Júlíus Vífill Ingvarsson, Kjartan Magnússon, Gunnar Sigurðsson og Björn Bjarki Þorsteinsson fluttu svohljóðandi frávísunartillögu:

Raforkuverð til stóriðju er trúnaðarmál milli tveggja samningsaðila. Kaupandi þeirrar orku, sem hér um ræðir, hefur óskað eftir því að efni samningsins sé

trúnaðarmál og við því verður orðið. Orkuveita Reykjavíkur selur raforku á samkeppnismarkaði og því getur það skaðað viðskiptahagsmunum fyrirtækisins að opinbera verð í einstökum orkusölusamningum. Tillögunni er því vísað frá.

Frávísunartillagan samþykkt. Svandís Svavarsdóttir og Sigrún Elsa Smáradóttir greiða atkvæði á móti.

Svandís Svavarsdóttir óskar bókað:

Þar sem tillaga um að aflétta leynd þeirri sem hvílir á orkuverðinu hefur verið vísað frá kýs ég að víkja af fundinum meðan umfjöllun um verðið fer fram. Mér er gert að halda hluta samningsins leyndum fyrir Reykvíkum sem ég er fulltrúi fyrir. Undir slíka afarkosti get ég ekki gengist. Fulltrúi Vinstri grænna telur afdráttarlaust að almenningur eigi lögvarða kröfu á því að fá verðið uppgæfið þar sem í þeim upplýsingum liggja miklir hagsmunir almennings. Jafnframt mun fulltrúinn áfram berjast fyrir því að raforkuverð til stóriðju verði gert opinbert.

Sigrún Elsa Smáradóttir óskar bókað:

Eðlilegt væri að leita samninga við viðsemjandann um hvort sátt gæti náðst um að aflétta leyndinni.

Svandís Svavarsdóttir vék af fundi meðan upplýst var um verð í gildandi samningum Orkuveitu Reykjavíkur tengdum álverði og samkvæmt verðskrá á almennum markaði, miðað við forsendur 28. desember 2008.

Tillaga um samþykkt samningsins samþykkt.

Svandís Svavarsdóttir greiðir atkvæði á móti og óskar bókað:

Gildandi samningur milli Orkuveitunnar og Norðuráls Helguvíkur ehf rennur út nú um áramót og hefði því verið um að ræða einstakt tækifæri til að endurmeta alla orkusölu frá Orkuveitu Reykjavíkur til langrar framtíðar í þágu sjálfbærrar þróunar og fjölbreytts atvinnulífs á svæðinu. Í stað þess er nú eina ferðina enn lagt upp í þá vegferð að selja alla orku sem Orkuveitan á og meira en það til álvers. Svo kann að vera að álverðið geti þróast með þeim hætti að um verði að ræða mjög alvarlegar afleiðingar af samningnum.

Blikur eru á lofti að því er varðar álverð og þróun orkuverðs því tengdu. Rætt er um endurmat á arðsemi Kárahnjúkavirkjunar í ljósi breyttra forsendna svo ljóst er að allt þetta umhverfi er breytingum undirorpið. Einnig hefur komið fram í fjölmiðlum að Norðurál Helguvík ehf geti vænst sérstakra ívilnana ríkisstjórnarinnar, verið undanþegið opinberum gjöldum auk annarra tilhliðrana. Þótt það síðastnefnda sé óstaðfest er ljóst að ríkisstjórnin hefur engin fyrirheit uppi um að snúa af braut stóriðjustefnunnar.

Margítrekað hefur verið mikilvægi þess að dreifa áhættunni, setja ekki öll egginn í sömu körfuna og nýta orkuauðlindirnar í þágu fjölbreytni og

vistvænnar framleiðslu. Það er því engu líkara en að meirihlutinn í stjórn Orkuveitunnar skelli skollaeyrum við öllum þeim varnaðarorðum og ákveði eina ferðina enn að beina allri orkunni í sama einsleita farveginn. Á stjórnarfundum Orkuveitunnar 13. mars bókuðu fulltrúar þáverandi meirihluta: „Meirihluti stjórnar OR telur tímabært að huga að fjölbreyttari kostum í heildsölu á raforku til stórkaupenda, ekki síst á grundvelli áhættudreifingar í rekstri og með tilliti til umhverfissjónarmiða.“ Hér er því um að ræða skýran viðsnúning á afstöðu Sjálfstæðismanna frá því í mars og ber að harma.

Loks er átalíð sérstaklega að samningurinn skuli koma til afgreiðslu með stuttum fyrirvara, að leyndin skuli enn sem áður hvíla yfir orkuverðinu og að kunnuglegt pukur skuli umlykja umræðuna alla. Hér er um að ræða verðmæti sem almenningur á í félagi og er óverjandi með öllu að ráðstafa henni með þessum hætti án þess að fram fari upplýst og heiðarleg umræða um þann gjörning sem hér hefur farið fram og þá forgangsröðun sem þar endurspeglast.

Sigrún Elsa Smáradóttir situr hjá og óskar bókað:

Endurnýtanleg jarðvarmaorka er ein af okkar dýrmætustu auðlindum og sala á raforku er og verður mikilvæg til gjaldeyrisöflunar. Mikilvægt er að áhættunni sé dreift við gerð langtíma samninga og að arðsemi fyrirtækja í almanna eigu eins og OR sé hámarkuð.

Stjórn OR hefur lýst vilja sínum til að dreifa áhættu með því að huga að sölu til fjölbreyttari orkukaupanda en álframleiðanda, sem ekki tækju mið af heimsmarkaðsverði á áli, sbr. bókun meirihluta stjórnar 13.03.2008. Ef aðilar gefa sig ekki fram í Ölfusi fyrir 1. júlí 2009 hefur OR, með samþykkt á fyrirliggjandi samningi, bundið alla orku sem hugsanlega fæst við 5. og 6. áfanga á Hellisheiði, virkjun í Hverahlíð og Gráuhnjúkum, auk þess sem samningurinn felur í sér viljayfirlýsingu um 75 MW til viðbótar sem óvíst er um hvaðan eiga að koma. Samningnum fylgir því binding á nánast allri fyrirsjáanlegri orku næstu áratugi.

Í því ljósi getur fulltrúi Samfylkingar ekki staðið að samþykkt samningsins.

Júlíus Vífill Ingvarsson og Kjartan Magnússon óska bókað:

Fulltrúar Sjálfstæðismanna í stjórn OR hafa í engu breytt þeirri skoðun sinni að æskilegt sé að huga að fjölbreyttari kostum í orkusölu til stórkaupenda en gert hefur verið til þessa. Fjölmargir slíkir kostir hafa verið skoðaðir, eins og fram kemur á upplýsingablaði forstjóra til stjórnar frá 23. desember 2008, en viðræður við þá aðila, sem þar eru nefndir, hafa ekki skilað árangri enn sem komið er. Þrátt fyrir samþykkt fyrirliggjandi orkusölusamnings verður enn um sinn haldið frá orku fyrir umhverfisvæna starfsemi í Ölfusi og er það von okkar að slík starfsemi verði að veruleika sem fyrst.

4. Lögð fram Fjárhagsáætlun samstæðu Orkuveitu Reykjavíkur 2009, drög dags. 23. desember 2008, endurskoðuð vegna breytinga á forsendum af hálfu Reykjavíkurborgar, sbr. frumvarp að fjárhagsáætlun Reykjavíkurborgar fyrir árið 2009 lagt fyrir borgarráð 20. desember 2008 og borgarstjórn 22. desember 2008.

Áætlunin samþykkt og vísað til bókunar stjórnar við afgreiðslu fjárhagsáætlunar 28. nóvember 2008.

Sigrún Elsa Smáradóttir og Svandís Svavarsdóttir sitja hjá.

5. Lögð fram til kynningar tillaga og greinargerð dags. 23. desember 2008 varðandi verðbætur óverðtryggðra verksamninga.

Næsti stjórnarfundur ákveðinn 16. janúar 2009.

**Fleira gerðist ekki.**

**Fundi slitið kl. 14:45.**

Guðlaugur G. Sverrisson,  
Björn Bjarki Þorsteinsson, Gunnar Sigurðsson, Júlíus Vífill Ingvarsson, Kjartan Magnússon,  
Sigrún Elsa Smáradóttir, Svandís Svavarsdóttir.